

四庫全書

集部

欽定四庫全書

集部

雅頌正音卷一  
三

詳校官中書臣丁榮祚

助教臣常循覆勘

總校官知縣臣楊懋珩

校對官編修臣盧 澂

謄錄監生臣詹師賢

欽定四庫全書

集部八

雅頌正音

總集類

提要

臣等謹按雅頌正音五卷明劉仔肩編仔肩字汝弼鄱陽人洪武初因薦應召至京集同時之詩為此書上自公卿下至衲子凡五十餘人而仔肩所作亦附焉用王逸徐陵芮挺章例也所選之詩每人寥寥數首蓋是時諸

人之集皆未成編隨得隨錄故未能賅備然  
明初諸家今無專集行世者頗藉以畧存梗  
概其時武功初定文治方興仔肩擬之雅頌  
固未免溢美要其春容諧婉雍雍乎開國之  
音存之亦足以見明初之風氣也此本猶洪  
武時舊刻歲久刊敝頗有模糊佚脫之處無  
別本可校今悉姑仍其舊焉乾隆四十六年  
十一月恭校上

總纂官臣紀昀臣陸錫熊臣孫士毅

總校官臣陸費墀



雅頌正音原序

雅頌正音者鄱陽劉仔肩之所集也其曰雅頌者何雅則燕饗會朝之樂歌頌則美盛德告成功於神明者也今詩之體與雅頌不同矣猶襲其名者何體不同也而曰賦曰比曰興者其有不同乎同矣而謂體不同者何時有古今也時有古今也奈何今不得為古猶古不能為今也今古雖不同人情之發也人聲之宣也人文之成也則同而已矣然則曷為謂之同江河沼沚有不同

也水則同陵巒岡阜有不同也土則同人動乎物有不  
同也感則同趨其同而舍其異是之謂大同曷為知其  
為大同期歸於道焉爾歸於道焉爾者何世之治聲之  
和也聲之和也奈何天聲和於上地聲和於下人聲和  
於中則體信達順至矣體信達順其亦有應乎曰有三  
秀榮鳳鳥見龜龍出騶虞至嘉禾生何往而非應也應  
則鳥可已也鳥可已則有作為雅頌被之絃歌薦之郊  
廟者矣是集之作其殆權輿者歟洪武三年十二月十



五日國子司業金華宋濂序



欽定四庫全書

雅頌正音卷一

明 劉仔肩 編

陶安主敬

姑孰人

石假山詩

世上好山如好人，偃傲不肯來相親。  
是何峯巒落几案，數寸氣象排蒼旻。  
是我聞好山芙蓉三十六，從有鴻濛露巖谷。  
一宵神運霹靂斧，但見二十四峯青立玉。  
翩然飛

去十二峯來向君家伴幽獨忽過雲間騎鶴侶為言此  
事非誇詡更有仙家十二樓化作游龍渡江去硯屏時  
映一拳小萬壑千岳共昏曉天地骨含千古清收拾精  
神不為少洞天兩竅秘莫窺虛冥眇漠涵天池須彌亦  
向芥子納靜中觀妙生神奇幽人拂拭愛瀟灑掌握烟  
霏恣陶寫着屐不勞追謝公山同心會忘真假

贈劉汝弼赴京

珊瑚生海底淵深邈難致人世曾幾株遂作希有視

陽古大邑文物淵藪萃干戈一紀餘衣冠日陵替際此  
維新朝四方延俊乂劉君孤鳳凰文彩無與儷才難古  
所歎寥寥不三二一夔作大章雖少已足貴選堂執權  
衡詞藻賞瑰異爵祿被光華名節勤砥礪孝親在顯揚  
報國最忠義薦才吾所職至珍得非易掇此芝蘭芳移  
栽上林地南風天宇高目送青雲驥

胡翰仲申

金華人

雪山亭詩為夏官章季明作

吳山跨東表稜層擬西域上有瓊仙館下臨萬家邑炎  
濁自茲遠高寒去天尺渾渾太素開肅肅玄霏積山合  
葱嶺勢水散銀河色鮫室亘湖曲星橋少人跡僧歸天  
竺寺漁傍蘇堤石飄飄楚樹春洄沿越江夕爽氣浮清  
都澄暉落瑤席觸物各有會撫時詎非昔宇宙良悠哉  
人生苦形役五年間音容相見抱衰疾手拂三素雲送  
爾雙飛鳥大明當中天光被南與北眷言羲和氏為紀

甲辰歷

送呂君采元史北平

又見陳農去遙臨析木墟山川遊幸後文獻亂離餘備  
極傳聞異歸從直筆書百年殷監在盡獻玉階除

劉基伯溫

括蒼人

有懷龍門先生謾書奉寄以寫別懷

龍門宋景濂號

有美一人兮美且都青霞為衣兮白雲為裾被秋蘭兮  
佩珣玕泰和與遊兮中黃與居瞻望弗及兮芳歲其徂  
山高水濶兮道阻且紆安得羽翼兮致我與俱

有美一人兮美且仁自我不見兮不知幾春仰玄穹兮  
睇參辰為合為離兮孰識其因青冥無階兮江海無津  
安得羽翼兮致我與鄰

有美一人兮在山中蒼眉黑鬚兮玉雪其容飲沆瀣兮  
食紫虹澡石泉兮灑清風邀初平兮從赤松超逍遙兮  
樂無窮安得羽翼兮致我與同

詹同同文

江夏人

張氏白石山房詩



浦江有名山白石如積雪玉氣亘中天龍湫無六月於  
茲隱君子結屋依翠微讀書日平樹看泉風滿衣誰謂  
野鶴姿從心自飲啄一落樊籠間清夢繞巖壑豈不念  
白石好鍊五色紋獻之補天手歸卧山中雲

寄吳朝錫

小樓殘燭短冠服候晨鐘紫陌嘶羣驥丹霄駕六龍朝  
回尋藥裏病起寫書封歲月驚華髮松楸動慘容春雲  
懷去友夜雨夢歸農淮海經年別何時得爾從

松澗亭

澗上長松一百尺，松花落澗流香雪。  
仙韶入夜度晴空，飛瀑隨風灑秋月。  
高人於此構小亭，上有雲氣山青青。  
昨日客來覓琥珀，旋汲清泉煮茯苓。

清江曲送宋尚德自峽中回

清江水清峽水黃，清江之上多綠楊。  
浣花女兒立沙際，青裙白足如秋霜。  
蜀山雪消十日雨，一夜扁舟欲齊樹。  
兩岸猿聲不肯休，送君流向峽州去。

題定子靜山陰草堂馬九霄為之篆扁

草堂正在匡廬山山陰綠玉相對閒雲從雙劍峰前下  
潮到小孤江上還茶烟滿室寫墨竹花雨一簾觀白鷗  
誰似南宮能篆古為君高置軒牕間

春日駕幸鍾山應制

大駕春晴臨寶地鍾山老翠擁金仙瑤花如雨三千界  
紫氣成龍五百年風送香烟浮袞服池涵樹影拂青天  
詞臣侍從何多幸安得詩才似湧泉

飲楊廉夫拄頰樓時予奉命徵賢松江故有此作  
飛樓高出市塵表萬丈文光照紫微洞仙曾與鐵為笛  
天女或裁霞作衣酒酣尚欲招鶴舞詩狂未可騎鯨歸  
休喚小瓊歌白雪自有玉簫吹落暉

寄方壺道人

海上神仙館天邊處士星卧雲歌酒德對雨著茶經石  
洞龍噓氣松巢鶴墜翎都將金玉句一一寫空青

題枯枝寒禽

王母宴歸西海上空留青鳥羽參差黃雲苦竹江南雪  
獨立寒條歲晚時

題水殿納涼圖

湖上闌干百尺臺臺邊水殿倚雲開紅橋人隔荷花語  
玉盃金盃進雪來

舟過黃陵廟

黃陵廟下倚船牕水淺沙平屬玉雙山外斷雲寒日晚  
半篷殘雪下湘江

八峽二首

黃牛廟下水如弦  
白狗峽中數尺天  
百丈牽春上巴蜀  
巖花無數照江船

歸州女兒採薪歸  
荷葉遮頭雨濕衣  
不怕山邊石路滑  
竹籃在背走如飛

題桃花馬圖

千載蟠桃花正新  
瑤池王母宴青春  
不知八駿歸來晚  
紅雨隨風落滿身

題王子充琴邊秋興圖

風泠泠兮木落山盤盤兮雲陰吾將鼓兮秋水誰能識  
兮此心

宋瀟景瀟

金華人

平江漢頌

天命皇帝為億兆生民主旌麾所向悉臣悉庭初以一  
旅之師興濠泗間遂撫淮南平江東攻浙東西下之建  
都江左發政施仁戴白之叟垂髻之童涵泳神化皞皞

熙熙如承平時號稱無事於時陳友諒據有江漢之地  
僭居大號賊殺其主飭修蒙衝虐驅烝黎如蹈水火不  
自度力又集蜂蟻之衆直窺豫章三月不解皇赫斯怒  
乃召羣臣於庭而告之曰陳虜不道敢屢予侮昔者蕩  
搖我邊陲侵軼我姑熟傾伺我金陵賴爾一二臣鄰之  
力攻而敗之予亦親覆其穴巢中宵竄奔假息武昌予  
不忍追殲之冀其悔禍以自逭於天刑癸卯之夏乃復  
圍我豫章是其凶德無厭自取殄滅此天亡之時天之



明威予不敢不順唯爾熊羆之臣不貳心之士尚弼予以成厥功羣臣曰都於是右丞臣達叅知政事臣遇春帳前親兵都指揮使臣勝同知樞密院事臣永忠同知樞密院事臣通海備厥戎器簡厥師徒以俟七月癸酉皇躬擐甲胄禡纛龍江帥樓船數百蔽江而上陳虜大營解圍而逃丁亥與我師遇鄱陽湖之康郎山戊子皇分舟師為十屯命達遇春永忠突入虜陣呼聲動天地矢鋒雨集砲聲雷鉤波濤起立飛火照耀百里之內水

色盡赤焚溺死者動一二萬流屍如蟻滿望無際己丑  
焚偽平章舟刈戮餘二千辛卯復酣戰虜將張定邊素  
號梟猛皇親禦之將士皆死戰歷一二時遇春等左右  
夾擊斃士卒無算張中矢百餘而退潛保鞋山不敢吐  
氣我師亦移據湖口扼彼喉衿列柵南北江岸置火筏  
中流水陸嚴戒以候其發八月虜食盡遣船五百艘掠  
糧都昌又為大將所獲壬戌虜計窮冒死突出將上趨  
九江皇命諸舟一時俱合其大戰如戊子自辰達酉督

戰益急友諒中飛矢斃於舟中癸亥降其衆五萬皇命  
釋之不戮一人凱歌而旋舳艫相銜旌旗飛翻不疾不  
馳委蛇而來萬姓驩迎俯伏道左山川草木皆有喜氣  
告廟飲至行賞論功賜遇春田若干永忠田若干其餘  
將士賚金繒有差臣稽在昔曹操治水軍八十萬來攻  
孫權而周瑜黃蓋敗之於赤壁苻堅發長安戎卒六十  
餘萬騎二十七萬以侵晉而謝玄謝石敗之於淝水然  
赤壁不過一焚而走淝水不過軍亂而奔初未嘗大戰

也史臣且書之以為千古美談矧今湖口之捷血戰累日天地為之晦冥日月為之無光河山為之震蕩其神功駿烈炳耀鏗鉤與天無極較之二國未足多讓而歌咏不作非甚闕典歟臣謹備著其事撰為頌辭一通以流鴻績於無窮以俟太史氏之采錄云其辭曰

天眷有德實維哲皇肆其神略以靖寇攘義旗東指罔敢不恭風烈虎嘯雲游龍驤長淮既歸江左攸屬浙之東西樹侯置牧乃建國家以奠南服以安中原以控西

蜀蠢爾小醜敢讎大邦集其兇頑鋒蝟斧蟪輕涉我疆  
以跳以踉亦既剪劉僵骸覆江洊齊三軍直傾其穴釋  
而勿誅俾自懲刷闔胡不然復豕其唾翹其蟲臂當吾  
車轍皇用震怒厯告在途是決不悛命將往征爾選舟  
師爾整甲兵爾漕糗糧各罄爾誠瑤光在申夷則之月  
禡牙江濱皇秉巨鉞以誓以戒以速其發紀律精明颯  
火奮激旗旒揚揚舩艘將將矛戈洸洸鎧冑明明載怒  
載厲載飛載揚雄威所吞已無荆湘既與虜逢大呼衝

擊藥騰藜礮星流火戰虐燄電奔巨轟雷劈殺氣冥蒙  
不辨咫尺矢鋒所貫什伍聯聯縱橫交紐命隕弗顛攢  
桅湊颿筍束蝟編流屍塞川舟行弗前虜魄既褫扶創  
而逸聚於湖奧僅存喘息我方植柵江之南北火筏在  
流掩蔽如翼越厯四旬飛走塗窮將冒萬死以絕其衝  
我師見之萬艖如龍似兔之走而鷹之從酣戰六時申  
辰達酉僕姑一發殪此酋首貫睛及顛仆若枯柳大慙  
既除餘不能醜遞相告言我實不振我革我頑我歸至

仁誰謂培塿可高嶙峋再拜稽首來降來臣皇曰俞哉  
汝俘予受宥汝弗劉予汝父母汝寒予衣汝饑予哺昔  
何昏迷今始撤郤奏凱而還騎吹鬱搖形於樂歌節以  
鐺鏡飲至於廟頒賞於朝帛堆其家肉登其庖都人聚  
觀舉手加額或歎或謠有聲嘖嘖干戈相尋匪一朝夕  
自今昇平可坐而笑唯皇神武動則克之羣策盡屈四  
方式之惟皇寬慈降則釋之義聲泯泯疇能敵之惟皇  
明斷遇事即決洞見千里不隔一髮所以西征成此駿

烈小大畢朝孰敢肆孽在昔赤壁泊乎合肥事以幸集  
尚傳冊書紀茲之功俊偉赫熹揆古無讓可無歌詩臣  
雖微賤文字是職敢揚皇威并獻臣臆三代以還用仁  
興國皇宜遵行永作民極

予奉詔總裁元史而故人操公琬實與纂修尋以  
病歸作詩序舊情見乎詞矣

憶昔試藝時年丁二十九不諳精與拙運筆若揮帚欲  
盡王霸言自寅直窺酉於時有操君許子乃其友同自



都陽來懷玉期一售風雅別正變卦畫參竒偶見者稱  
雙璧光芒射牕牖及至淡墨題氏名列某某果符人所  
占二榜皆冠首顧子坎墮姿甘在孫山後有司非冬烘  
懸鑑定妍醜終然采芑藁難可混稂莠盈盈羅剎江顏  
色綠勝酒忽然潮汐生龍虎共吟吼買舟踏澎湃共折  
江頭柳別歸金華山幸有雲半畝結茅澗之阿敢曰松  
桂誘尋鶴陟歇磴避人下關牡外物絕他縈中局森獨  
守鑽摩六藝學誓以托不朽奈何荆楚間妖氣夜衝斗

蔓延浙河東無地不深蹂帕額手執刀騎馬向林藪殺  
戮何忍聞流毒到鷄狗幸然一命存微賤不敵匪猶携  
舊書囊遑遑戴星走許子忽相逢短襦不掩肘涕下如  
綆縻容枯類羸叟稍稍叙離合即問君安否云君兵燹  
餘充腸乏蒸糗念君五內熱談說不寘口何時挿兩翅  
執經趨左右大明麗中天流光照九有僭亂皆削平清  
淨無纖垢垂衣坐法宮充耳施纊黈湛恩極霑霈天地  
同高厚羣臣再拜跪齊上萬年壽帝曰元有史是非尚

紛糅苟不亟刊修何以示悠久宜簡岩穴臣學識當不  
苟衮斧嚴義例執筆來聽受使者行四方持檄盡蒐取  
非惟收譽髦最欲尊黃耆予時奉詔來君亦至鍾阜一  
見雙眼明不翅蒙發部大啟金匱藏一一共評剖發凡  
及幽微勝辨白與黥奈何君有疾容邪干氣母偃卧木  
榻間臚逆夜加嘔醫言濕熱勝良劑急攻措恨無延年  
術玄霜和鬼曰日念芝山青親之若甥舅翩然賦式微  
使我心如灸傾歌車闕轅顛倒衫失紐若何慰勞勞吾

誠嗟負負平生湖海情  
臨岐忍分手官樓沽酒別無錢  
更留綬醉後雙耳熱擊壺如擊缶  
汀草漲綠莎川花破  
紅藕須記送君時  
四月日丁丑

浩懷

漆園欲齊物伯陽期守玄  
修軌務絕絆沖志在潛淵  
夕陰冥蕙幌晨陽暖石田  
外膠一以遺澹泊返自然  
五圖非謬記九籥有真詮  
青青林間雨勃勃谷竇烟  
松花行將熟采之釀紅泉

題胡博士嘉樹詩卷後

花蕊峰前水滿溪，溪南嘉樹可雲齊。  
黃腴期鑄萬年魄，青兕時遊九曲堤。  
晴影落庭生遠思，秋丹入葉愜新題。  
似茲聳拔高千仞，憶昔封培始寸莢。  
雨露華滋無上下，書詩佳問到東西。  
春酣碁響猿來下，夜半琴鳴鳥失棲。  
細字題詩盈玉軸，當時操管盡金閨。  
未論氣魄成曹謝，但見光芒射斗奎。  
大藥芳顏難久駐，西風迅景倍酸嘶。  
有金莫鑄文園象，無客能然照水犀。  
所幸絺章存簡冊，

便藏寶篋比懸黎  
顧予何意裁文錦  
久客無言類木雞  
嘉蔭未瞻街作樾  
吐辭安得氣如霓  
角弓既有前人咏  
聊拾殘膏付小奚

步虛詞五首同劉伯溫程邦民賦

大梵凝神霄剛飈  
遡寥陽一氣上下通  
冲華結靈長五  
英迴黃旂清蕤起  
中央西若延顥氣  
東瓊羅翠鄉遼遼  
密密間何從別圓  
方歛然欲上征斑  
龍為之裹

虛皇降大庭  
肇自浩劫初  
六角垂赤文  
洞神流寶書  
龍

節既開紀鴻靈悉受符藏之蕭臺中靈鬼翼以扶豁落  
七斗芒發洩兩曜樞天真許度世稽首朝元都

太霞凝真和綠瑛隱玲瓏燿火浮朱陵虛靈蕭淵宮紫  
壇升三成薄夕祠天宗帝一駕象輿八神儼來從絳節  
九靈旂衛以白玉童颯爾神響合元黃孰知蹤

中天屹璇居寥廓俯帝青閭闔左右開銅龍巧承楹力  
士列兩觀呵衛執以兵曾颺自中啟八鸞相和鳴五時  
凝天器幽冷辟陽精歎歌三洞章心與萬化冥

七玄真皇君賚以五炁文龍泥入印紫金檢浮空溫暉  
羅鬱紅晶結鄰奠玄雯招招九天使飛蓋隨飈輪三華  
吐明景敞朗夜炁分消搖大羅上同禮天中尊

夏煜允中

金陵人

讀宋太史潛溪集

混沌初刳太素斲挺生神人斷鰲膊剖乾割坤奠海嶽  
厥俗鴻荒人未覺帝命圖書出河洛奇耦生畫參伍錯  
煥乎斯文此其璞二三啟運乘飛躍典謨訓誥雅頌作



黍離以降周室削天將尼父為木鐸乃芟詩書定禮樂  
乃作春秋明善惡紀羅萬象歸一勺放彌六合卷諸橐  
七十二子相唯諾才出中州氣渾朴及漢史記變矩矱  
西京雄健東京弱建安馬上詩橫槩其音稍振氣已駁  
晉更六代轉銷鑠唐包九有復充斥至宋諸子雄相搆  
廬陵崛起超卓躒道州獨立承絕學後出新安最宏博  
有元將相皆沙漠往往南士登館閣從此斗牛氣磅礴  
乃挺竒才海東角蚤年脫穎何落魄貫穿經史探韜略

出入佛老搜冥漠鯨跳鼉抃鬪鮫鱷不持寸鐵徒手縛  
大弨射日孰能曠長劍倚天誰敢斫是乃浩然之氣擴  
簸弄元化筆在握星辰迸空如石落剛風立海大雨雹  
湧湍疊躍濤怒搏百怪倏忽光揮霍矯若魚龍舞灑灑  
蔚若虎豹跳峯寧飄若孤飛駕黃鶴勁若百鷲出元鶚  
鉤鏗大音振咸濩赫奕雄芒射干鏌迫而察之吁可愕  
注如懸河思不涸大田五穀當秋穫武庫衆寶開晨鑰  
左右而取非外攫遂造平坦鏗磻确淙淙安流宗大壑

上尊玄酒殊澹泊東序天球匪雕琢自然光燄發葩萼  
我時訪君即命酌春風蒲萄釀酥酪雪夜攪毬擁鼯鼯  
招月與友相酬酢月入尊中明可捉漱燕醲郁棄糟粕  
此時豪縱脫矰繳吐竒抉怪安可約有烏如火天井絡  
掃除旬始銷格澤金篦刮目割翳膜郢斤斲鼻揮漫堊  
妙處神會不可度而我旁觀駭且忤如遇仙人授金藥  
一食生羽脫塵殼願為子弟請竒着先生忘言只大噉  
予亦歛衽逡巡却如此筆力扛鼎鑊不遇明主將焉泊

聘以束帛加雙珏幅巾大布起林薄奏賦上林從楊柞  
豈比執戟甘寂寞天王手按龍泉鏐大振天聲重開拓  
勢若新篁解春籜用爾圖像為丹雘用爾作樂為蕭簫  
銘功頌德軒寥廓日光月潔江漢濯前驅班馬鞭六駮  
後駕蘇歐驂兩駱千載而下宛如昨碌碌餘子徒齷齪  
傑哉先生果何若微子之裔散人託景濂其字大夫爵  
我作狂歌非用謔投以木瓜報芍藥

哀孫炎

垂老戎馬間相知復何有幼與孫炎交於今俱白首炎  
也雅好詩落魄惟耽酒醉中有神助不放持杯手才豪  
不受羈馬膏事田畝精勤脫穎出盤錯迎刃剖浪迹帝  
王州結交英俠藪喑喑朝陽桐濯濯新春柳南北暗兵  
塵妖星下天狗戎皇入金陵一見顏色厚高談天下計  
響若洪鐘叩即拜丞相掾奉身事明后再分太守符兼  
綰都官綬括蒼實重地豺虎白日吼皇曰汝孫炎其往  
總制某再拜謝不敏寵命敢虛受一年風俗淳二年民

物阜三年遠人歸上表請官守文章曹劉亞政事龔黃  
右舊歲過金華與炎適相偶寒燈夜半花春盤雪中非  
終宴竟忘疲落月斜半箇臨別各上馬攬轡復立久為  
言有小女離家方襁負今來已五周見父能認否未必  
到家期封書附姑舅置書篋笥間纔隔二月後墨色尚  
未乾語音猶在口胡為內變生失我平生友復恐是夢  
中仰天當戶牖斗柄昏建辰月魄夕在酉乃知真死矣  
慟哭吞聲嘔後聞遇害時扞刀落雙肘奮怒髮衝冠大

罵血漂白維時東南天彗出芒如帚淫淫苦雨愁烟  
驚電走魂兮早歸來空山不可狃我過孰與規我病誰  
云灸春酒釀薔薇奠子墳山在西京七葉貂零落成草  
莽既有千載名馬用百年壽峨峨馮公巖與子同不朽

康郎山奉旨

三軍戰罷日重輪好雨東來為洗塵絕壁秋聲清漱玉  
白沙月色爛堆銀氣成龍虎知王者兆應熊羆得老臣  
半夜內官催草檄燭花影裏繡衣新

題杞上人所藏小畫

太陰慘澹雷雨泣懸崖老樹蒼蛟立亂山鱗鬣雲氣寒  
石火迸出金流汁君不見老禪好畫如好色尺寸須酬  
萬金直何如天台看蒼石

王禕子充

金華人

南康郡齋

承恩紆郡紱服職効官箴秩厚幸粗給力屨非所任惟  
忻民訟簡恒恐吏議侵殘忙既摩撫宿蠹亦搜尋此邦



乃名郡經變已年深荆榛猛獸處瓦礫悲蟲吟道院存  
故號公庭蔽荒陰前瞻彭蠡澤後揖匡廬岑緬懷昔朱  
子遺愛在人心往軌儻可踵吾將自茲今

允載章生歸枯蒼賦詩贈別

自我來金陵閱歷今十載取友日滋多雲萍摠湖海誰  
其最知心生也情藹藹若翁中丞公高誼尤慷慨其量  
淵汪洋其器山嶺巖起家本詩書致位今鼎鼎視予猶  
弟昆往往過期待古人不可見賴有若人在生能繼翁

志愛我曷嘗怠寂寞旅邸中過從不嫌再晨游輒交申  
夜語恒到亥繼晷焚膏油引饌羞脯醢哦詩卽成諧索  
紙不為賄生也姿甚良為學如築壘基固益加崇力勇  
那嬰侮窮經鉤隱微臨文絢光彩擣藻拔英華春空雲  
靉黷求教生實渴待問予則餒譬如處暗室何從視高  
壇又如枯竹筇安足扶魁魁坐此真可慚生猶不予猥  
居然膠在漆逾久好逾倍茲焉舍我去契濶將無乃故  
山栝蒼蒼筍簾春可採臨清挹潺湲摘鮮收蓓蕾歸哉

誠足誇類戰獲旋凱新憂固服期具慶須舞彩父書讀  
仍勤聖轍遵毋殆卒業究遠圖失學防後悔君子惜寸  
陰玄髮容易改我方墮踈慵長路媿駑駘此心獨生知  
盍亦匡不逮臨別傾巨觥聊用澆磊磊豈無別離淚肯  
效兒女洒宣室行名賈金臺正需隗重來倘有期話言  
勿予給江花思漫漫贈別乏蘭茝短歌寫真情庶當珠  
一球

奉題王會圖

自昔興王盛要荒敢後期梯航重九譯冠帶極羣夷執  
贄稱周貢來庭表漢儀紛然方物備各爾土風宜氍罽  
交揮霍珊瑚競陸離象牙來赤徼犀角出黃支畢獻俱  
珍異咸懷係撫綏同人斯有象至治實維時紀事歸惇  
史圖形屬畫師睢盱真髣髴駱驛互參差不藉良工筆  
誰窮異域姿千年觀盛際允矣在今茲

題邊人雪獵圖

天山十月雪如席千里平沙絕人蹟名王貴人擁騎來

較獵合圍凌大磧馬馳閃電飛錦鞞箭激流星響金鎬  
逐鹿驅熊勢轉雄揮旄揚幟光相射風號甌脫凱歌還  
日落穹廬塵暗息共誇意氣滿邊庭孰遣形容到中國  
單于犯塞彼何為左車臨陣真無敵燕然勒石載勲名  
要復公侯笑談覓

應上人自開先寺來訪因寫詩為贈上人以大慧  
普說石門樞要二書見示故及之

匡阜東來路欲迷山風吹雪滿迦黎眼看玉峽雙龍出

金定巳年三月  
卷一  
自伴雲松一鶴棲妙喜語言真寶鑑寂音文字比金銳  
荒城飛錫來相訪還笑當年限虎溪

次韻答上清周道士

山中一別五經春近得詩篇意度新文字須為方外友  
神仙元是世間人洞雲玄虎司丹室壇月青鸞禮玉宸  
坐對匡廬秋色好欲將寄遠苦無因

郡齋偶賦

宦况真蕭索虛齋足晝眠思親懷愛日閱史記疑年白

髮生愁後黃華立醉邊風流陶靖節輸爾早歸田

雅頌正音卷一



欽定四庫全書

雅頌正音卷二

明 劉仔肩 編

汪廣洋朝宗 高郵人

大祀

維皇建有極  
庚庚歲時  
康二氣迭敷  
宣允若重  
雨暘季秋  
成物際報  
祀禮有常  
掃地事明  
薦穹廬列  
周行鼓鐘  
宿在縣玉  
帛粢成筐  
陶匏湛醴  
齊大登具  
牛羊匪侈  
禮

物豐貴在誠意將今夕乃佳夕天高露氣涼微雲散晻  
靄衆星羅縱橫濟濟百執事念茲靡或忘金門少馬闢  
和鸞鳴聲揚旂常紛左右燔燎彌耿光宸旒儼祇肅對  
越位中央八音唱律呂佾舞節趨蹌所舉靡不備所及  
靡不臧川岳永流峙風雲儵低昂神靈符盱纒鑒假達  
羶鄉錫福何簡簡降福何穰穰既灌隸雍徹精神合一  
堂願祈億萬年禴祀及丞嘗載歌周頌篇庸擬被樂章

大饗

諸侯謹述職方伯敬來同後世尚斯典往古有遺風維  
茲獻歲始大鈞妙化工川泳雲飛間罔不被薰融至尊  
垂衣裳雋髦蔚景從土宇日已廣民物日已豐匪文莫  
附遠匪武孰成功不有勸賚美恩意何由通乃命行大  
饗禮數極雍雍三公相左右百辟序西東祥飈臨宇來  
旭日當天紅嘉穀薦脩脯旨酒酌春缸舞干何于于擊  
鼓何隆隆儷曲被朱絃清磬和考鐘尊卑同一歡遭遇  
靡易逢豈惟浹和樂厚在肅儀容自昔周室時君臣期

令終頌歌咏鳧鷖錫予賦彤弓其慶何綿綿其音何漚  
漚所以億萬載慨念斯無窮小臣奏雅章稽首對九重  
壯遊奉簡諸閣老

壯遊吳楚外揚舫遡天風名山浮紫翠大江走蛟龍  
歷覽思超越毛骨生冰雪脫巾漉清湍舉手弄明月  
明月懸青銅古人難再逢牛渚委陳迹蛾眉斂愁容  
九華舞傚傚窺見滄溟底小孤立亭亭徘徊女蘿裏  
流宕鄱湖瀨巒峰愈出奇半空構樓閣峭絕掛猿獼  
放意恣陶寫

援筆灑秋泚神怪動窈冥魚鳥覺欣喜路逢丹丘生來  
自赤霞城麻姑後飛鳥子晉迭吹笙湖光瀲灩開雲壓  
葡萄綠狂引黃金壘嘯歌紫芝曲左蠡素相得雷湖忽  
見迎揚瀾平一掌中有龜鼉行振衣板鷁巢捫蘿踐苔  
石崖氣凌空青松花墜階白舉首匡廬下調笑烟霞間  
屢會復屢往今往幾時還叢蘭被路蹊芳草縈澗谷長  
颺和鳴鶴迸泉驚飲鹿須臾見五老邀我山之陽授我  
長生訣兼遺洞玄章問我從東來迢迢汎鯨波三山得

無恙十洲近如何旁招廣成子俯挹山中老鯉魚躍天  
江鷓鴣下天沼待以青精飯勺以白玉漿垂龍左耳潤  
吠犬靈苗香渴烏漸斂翼拭目增晚碧朵朵金芙蓉憑  
虛落胃臆西南挺竒異江湖馳偉觀披衣古蘭若丹堊  
耀嶺岼嘗聞遠法師堅坐東林下還許陶淵明共結白  
蓮社又聞李太白酷愛香爐峰長安卸塵鞅欲歸巢雲  
松往事既云遠顧我復來此濯泉坐繁陰下洗巢由耳  
綠髮雙青童采芳留我行我行欲不行月高猿夜聲西

山招我遊明日過湖水笑隔南浦雲遙謝數君子

山有湫

山有湫雲翳鬱風颭颭近在章貢之陽崆峒之幽湫波  
冰浸石骨底陰森樹木相綢繆上有千尺之翠壁下有  
百尺之蒼虬神靈鬼怪變恍惚驅逐雷雨無停留今年  
五六月稻禾乾欲死蒼蒼章貢民束手坐待斃嗟哉兵  
困餘何以復加此山湫有靈聽我言爾虬宅茲久蜿蜒  
安危同境憂樂然寧不一出為我民周旋坐令膏澤遍

四海力挽函歲成豐年山有湫生雲烟

魏觀杞山

江夏人

夜宿江夏水驛將往衡湘留贈親友

茅屋江聲合松舟月色遲把杯頻就席剪燭共題詩攬  
瑟清湘夜聞簫赤壁時美人千里外迢遞寄相思

贈友

東山偶為蒼生出南紀來分聖主憂爭觀台星臨左轄  
炯如霽月麗中州梁公引士賢才出常相傳經弟子留



正論每聞闕治體  
綸音端為老成求

朝挹天香詠紫微  
夕馳清夢繞黃扉  
國風正頌周公化  
霖雨重徵傅說歸  
天上皇猷增黼黻  
人間元氣屬樞機  
江南民俗今淳厚  
政教從來願不違

吳琳朝錫

齊安人

奉命徵賢道出桂州

纁帛徵賢出帝畿  
殊方歲晚謾驅馳  
撞家茅屋依林結  
賈客鹽車下坂遲  
雪片竟虧滕六巧  
梅花不負少陵詩

何當俊乂幡然起同向虞庭看鳳儀

廣南舟中

嶺海重瞻宇宙新民風尚似古時溥  
蜒人浮宅一舟小蠻女汲溪雙甕勻  
冬煖有花飛蛺蝶天荒無筆寫麒麟  
茲行猶幸諸君子相約同看上苑春

開化道中

重岡狹路倦登臨喜見溪流華步深  
楊柳樹邊舟小小海棠花上雨沈沈  
一春王事過三月千里家書繫寸心

無補盛時縻好爵樗材只合老雲林

烟波亭

漢水連天濶江雲護曉寒  
青青山幾點最好倚欄看

陶凱中立

天台人

君道篇

龍飛應景運居中攬乾綱  
百川宗巨海衆星避太陽  
股肱者誰伊與傅爪牙者誰叔與虎  
玉筍班中列衆賢金馬門中登碩輔  
梧桐生鳳凰鳴四海為一家於穆皇風

清修禮樂正綱紀明后復無為詒謀千萬禩

贈琴士施彥昭

君不見鳴琴無賞音伯牙絕絃仍破琴又不見斲琴無  
良工焦琴終為爨下桐大江之南多好山孤桐往往生  
其間武陵城中百萬家斲琴施氏良足誇嗟哉施氏之  
外無復人桐樹枯死終為薪令人好尚與古異人間雅  
琴多棄置雅琴苦少秦箏苦多嗟哉施君將奈何

長平戈頭歌

長平野人鑿地得古戈上有款識字歲久俱滅唐惜不  
能如豐城古劍射牛斗吁嗟戈兮奈爾何但見青銅凝  
寒暮烟紫月黑山深夜飛雨恨血千年猶未消荒郊夜  
夜啼冤鬼當年趙括輕秦人降卒秦坑化為土嗟哉趙  
亡秦亦亡落日荒城自今古摩挲爾戈一問之令人為  
爾生愁思何不以爾為鐘鐻何不以爾為鼎彝吁嗟戈  
兮徒爾悲爾今還當太平世人間銷兵鑄農器願壽吾  
皇千萬年終古不用戈與鋌

閨情

妾住金陵步郎上西江船光陰似流水安得長少年

曾魯得之

新淦人

贈黃道士還九宮山

我家羣玉山南陬君居蒙頂最上頭相望欲識嗟無由  
搖搖心若風中旂君從少年慕遠遊誓駭笙鶴仍丹丘  
冠星佩月露為裘口誦赤玉靈書謠摩斥八極隘九州  
後天不老三光凋故鄉臨晚母停輶下視起滅如浮漚

九宮山高明翠虬真牧之子世莫儔君居其間業焚修  
五十餘載無悔尤翠華昔駐鸚鵡洲承恩召對黃鶴樓  
數陳屢沐天語酬大官醉以白玉甌去年弓旌復旁搜  
麻鞋徑入朝冕旒神皋繁麗不宥留日夜稽首還山求  
山中之人寄書招雨餘黃獨抽新苗芝草琅玕弄春柔  
不歸負此岩壑幽龍江送別情悠悠鄉人歌作商聲謳

鄭淵仲涵

金華人

次韻宋學士見寄四首

涉江采新綠攬之不成歡我心獨何苦臨風屢彈冠無  
心問明月有懷如長川且歌擬招辭采芝向商顏

商顏有神芝豈徒樂苦饑可以起沈疴可以滋容輝乞  
身在強健行樂須及時願言賦歸來慰我朝夕思

夕思苦長夜欹枕聽征鴻征鴻為稻梁南北何憧憧相  
隨有流水莫比情無窮起來步簷下倚遍青青松

松月流光精照我雙瞳青千里共徘徊兩情正交并取  
琴彈別鶴弦寒不成聲誰知揚州地亦隔牛女星



宋學士贈詩用韻以謝

我憂何日消正若塵土積心隨道路長目斷山川碧依江東雲卷舒度朝夕皎皎海底蟾升高吐秋色雲月會有時猶可慰寥寂我人胡睽違不得從公側年來性踈拙百病身已瘠鳴鸞入仙洲孤鳳憐影隻灑淚向公言為我重悲惻

楊訓文克明

維揚人

春日遊真常觀

攜琴偶獨來尋幽入芳樹林深鳥聲寂坐久澹忘慮振  
衣下崇岡斜陽在歸路

送朱煥章稅使得歌字

歸鴻起天末殘雪迷山阿美人事行邁離思隨滄波華  
輶待明發祖餞冠蓋多旭日照芳席微風動鳴珂征商  
良自古報効將如何終當期令名四野咸謳歌

周元善以蓬山自號為賦

蓬萊山色鬱嵯峨上有神仙醉後歌瑤草綠深知歲久

琪花香暖得春多  
虛勞謝叟乘舟問  
曾見秦人採藥過  
獨有周君會中意  
不須辛苦涉風波

賦得鳳凰池送李教授歸河南

鳳凰池上送歸船  
渺渺清波接遠天  
沙背雨添蒼色潤  
溪毛春濯錦紋鮮  
來儀宛似聆韶樂  
應瑞何殊集潁川  
從此揚帆看君去  
薇垣明日聽傳宣

題曹子益可竹軒

揚州富豪十萬戶  
盡買金盤芍藥栽  
子獨幽棲一軒竹

手移瀟灑數竿來，秋聲入枕回孤夢。  
寒鶴隨人啄細苔。  
我亦平生愛蒼翠，幾時解佩出塵埃。

寄石仲文

故人別後復如何，不寄新詩到薜蘿。  
賈誼書成何日上，張衡愁比向時多。  
江城木落霜連地，澤國天寒水不波。  
重約明年秋八月，紫薇花底共鳴珂。

水雲軒詩為張志道賦

華軒結構水雲鄉，中有高人逸興長。  
睡起波光搖簡冊，

坐來嵐氣潤衣裳  
青山常立飛甍外  
白鳥時過釣艇傍  
相對紛紛總詩思  
豈應重問舊滄浪

答山堂上人見招

海氣寒欲雨  
空齋坐寂寥  
遠煩童子至  
深負老禪招  
高竹青當戶  
香醪綠滿瓢  
好留詩興在  
相與醉明朝

贈友

與子分攜後  
星霜二十年  
重逢驚老大  
惜別更留連  
花落春江雨  
鶉啼綠樹烟  
幽懷浩難寫  
愁墮酒尊前

滕毅仲弘

鎮江人

啟行

虞卿雙白璧魯連千黃金重輕豈在彼在此方寸心聲  
名落天地輝采流古今沒齒無一稱終將媿朝簪晨趨  
螭石下夕過鸞閣陰茲焉復申命載道荆山南閑中牧  
龍媒韝上馴鷲禽豈徒飽芻肉神俊令銷沈揚舲大江  
水弭節春樹林高高向明月聊用開吾襟

靈應祠

吳船何汗漫周道正倭遲雪涌蝦蟇焙花深石馬祠焚  
蘭瞻玉座析羽動金支靈降雲如綵巫歌月在帷林高  
懸薜荔洲近被江籬小駐娛今夕前驅恐後期嘏傳唯  
好語行邁藉蕃禧願沛霑民澤微涓敢自私

三閭大夫祠

簷帷褰薄暮迴颼吹白雲下有棲神宇慘淡臨江濱行  
吟既不返遺響寧再聞綠榮並丹綵婉爾舍清芬沐芳  
正冠佩酌水炷夕熏長歌靈谷應春思何紛紛願言卜

瓊茅巫咸不可羣渚宮望儀羽再拜雲中君

秭歸即楚王臺舊基為新城

春風夔子國落日楚王臺江繞西陵下雲從上峽來壯  
遊今已遂幽思獨難裁關塞猶戎馬吟邊首重回

采石

騎鯨仙人海上歸至今草木猶清暉千山落日送樵笛  
萬里長風吹客衣春空蛾眉浮翠黛夜光犀渚沈珠璣  
神遊故國應過此高冢臨流知是非



周湏伯寧

金陵人

始發建鄴登龍江山祠感懷有作

去國思舊游尋山發幽眺遙凌天門石恍對臨海嶠神  
關列雄鎮粉堞抱遺廟天水遠自空雲霞近爭耀客行  
始多感世事紛難料同俗豈素懷趨時固殊調既為達  
士恥復被逐臣誚塵淚應言垂江容帶愁照秋陰散微  
翳炎景扇餘燎行矣庶無欺忠信將可劬

池口舟中見九華山

貞履無素期勞生意恒窘誰云戒戎路曾是返初隱水  
宿淹長晷山行阻修吟縹緲對雄標巒岼發竒蘊岩回  
氣如熾峰去勢猶引刻削冠青蓮雕鏤蠹丹筍堪霞上  
斑剝石乳下礪礪山鬼從文狸淵靈悶玄蜃睽言志藜  
藿未遂採芝菌觸事情已悲懷賢蹟俱泯潛吳愧梅福  
去汶羞閔損人德險未夷天道明可準皋蘭豈徒歇岩  
桂芳未隕歲暮山中人結言候歸軫

賽小孤廟

育秀凌華嵩標竒莫淮楚陽闢啟神關陰沈開水府渾  
渾聚商舳淵淵聞戍鼓陳瑟會安歌傳芭紛代舞椒漿  
既芬潔桂權方容與日暮懷歸情含睇望修渚

題營丘山房

周室疏封後齊疆啟國初流風看後裔形勝想遺墟水  
合如分魯山回似入徐路疑登載處溪擬釣橫餘紅樹  
臨關近青蕪際海疎徵賢方奏頌何暇賦閒居

寫江岫春晴圖

汀洲碧草生鳧鴈動春聲莫上高亭望能傷送別情

吳志淳主一 豫章人

春日遣懷二首

四顧山河歸一統明君文德似唐堯幽燕地濶干戈息  
吳楚春深雨露饒中古衣冠存舊制南來律令有新條  
腐儒擊壤茅簷下為擬謳歌答聖朝

貧病相兼氣未舒田園雖少樂耕耨為儒已入他州籍  
垂老頻收故國書夜雨湖山人去後春風門巷燕來初

潘生喜遂閒居志阮籍從教禮法疎

夏日園中清暑二首

青山地僻車馬稀十載倦遊樂式微傍谿卜築面流水  
拂石展簟消炎暉老翁過從就蔬食幼女補綴成絺衣  
西亭去家苦不遠日暮共逐漁樵歸

東湖萬頃波渺茫人家多在雲水鄉竹枝調短阿家女  
桃葉歌長何處郎疎林歸鳥度花影近水流螢浮竹光  
東山坐待月已出不覺涼露沾衣裳

春遊二首

湖上輕風吹柳絲湖邊細雨濕花枝百年總有三萬日  
一日都來十二時杜老每尋崔氏宅山翁偏愛習家池  
乘閒取醉真吾事度水看花也自奇

山中蘭麝香滿林故人清遊能遠尋燕來已覺社日近  
寒退始知春意深山光入眼凝遠翠華影到湖生夕陰  
慈雲咫尺不一去薄暮還家空復吟

雅頌正音卷二